

KICO TA JOUVERT MORNING Y CON EL A CUMINZA

(Saca for di documentacion di carnaval di Jubi Naar)

Jouvert Morning ta un di e tanto cosnan relaciona cu Carnaval cu nos a herede di imigrantenan caribense di islanan britanico y frances, tambe di imigrantenan di B.G. (British Guyana e tempo ey) y Trinidad.

Jouvert ta un palabra frances cu kier meen "comienzo di dia" y usa den temporada di carnaval como "comienzo di parti mas importante di carnaval.... e parti final".

Mey di añanan 40 "Jouvert" a cuminsa bira conoci riba nos isla, principalmente Bachelor's Quarters, Esso Height, Rooi Hundo y mas pabao den San Nicolas, Village y Zeewijk.

Mey mey di añanan 30 cu e

imigrantenan di e paisnan caribense a cuminsa bin Aruba, "Jouvert Morning" tabata conoci cerca nan caba, pero ta despues cu e imigrantenan a subi caya na 1945 na Esso Heights y Bachelors Quarters pa celebra FIN DI GUERA cu Shu Shu Baby cu su "firstpan" dirigiendo un steelband chiquito y cu Calvin Assang cu un grupo di imigrantenan bailando como grupo, e palabra "JUVE" a cuminsa resona mas den temporada di carnaval.

Mas fuerte el a bira despues di Augustus 1948 cu Calvin Asang cu e prome grupo di carnaval di San Nicolas, "Arabian Nights" a subi caya pa celebra 50 año di reinado di Reina Wilhelmina.

Di temporada di carnaval 1949 pa decada 70 "Jouvert" no tabata conoci pa nada di locual e ta awe. Ni e "Jouvert Morning".

COMIENZO DI JOUVERT MORNING NA ARUBA

E comienzo di "Jouvert Morning" original di Aruba tin un confusion cune ainda. Awe, por menciona number di hopi hende cu tabata envolvi, pero tambe cu lo por trece discordia innecesario.

Na cas Village Noord (VN) 25 un grupo di mucha tabata haci BBQ ora cu diripiente nan a cuminsa bati riba hemchinan bieuw y e tapa di

bom di gas.

Un di e muchanan tabata tin un paar di drum na cas, otro un trompet y asina nan a lanta e banda "The Twelve Tribes".

Despues di a toca henter dia, den oranan di madrugada nan a

dicidi di sali riba caya cuminsando patras di unda awe tin Bevolkingskantoor (Sabastraat 7) y tene nan jump up den tur hanchi di Village.

Poco poco hende a cuminsa sali di nan cas pa jump cu nan.

Ora cu nan a sali pa bay riba caya banda di Kenny's, polis a para nan.

A bini protesta di e hendenan y polis e tempo ey bao mando di Comisario Fred Wiel a duna nan okay pa toca pero nan mester keda den Village.

Nan a toca te mas o menos 11 or mainta y di eynan tur hende a bay prepara pa bay parada grandi na San Nicolas.

E año cu a sigui e grupo a wordo dirigi pa Sra. Mary Simons

"The Twelve Tribes" tabata consisti di Pedro "Bito" Wilson, Romito "Boy Blue" Baptist, Ronny Maxwell, Orlando "Morcoy" Whitfield, Dean Gumbs, Alfonso Gumbs (q.e.p.d.), Mighty Stinger (q.e.p.d.), Dino Challenger, Bololo Mardenborough, Cisco Cork, tambe a forma parti Glenda Brown, Martina Arrindell, David McKenzie, Carlito, Selmo Cooper y un persona di faam Giel.

Despues di e dos añanan aki, Swinda Petronella-Kelly a tuma e actividad over organizando e salida for di su cas den e Speeltuyn grandi cu tabata tin den Village Zuid.

Tabata bao direccion di Swinda cu e Pijama Parade a haya e nomber pasobra hendenan tabata bin bisti na pijama y japon y tabata bini tambe cu wea di orina (estilo anticua) cu bebida den dje pa bebe y despues pa toca ariba.

E jump up tabata pasa den hanchinan di Village y tabata tin muchanan padvinder, tocadorman di steelband. E bunita di e prome añanan aki tabata cu NUNCA tabata tin un problema of bringamento.

SAC a acerca Swinda pa hinke den programa di Carnaval, locual Swinda a bay di acuerdo cune y e prome combinacion di Swinda-SAC a termina tambe cu e tradicion di

Jouvert Morning den su cuna cu tabata VILLAGE.

E parada aki na 1981 tabata e parada den cual S-UNITED riba un truck grandi a ser usa pa pasa den hanchinan smal di Village cu Jouvert Morning, y na dado momento a pega den un di e hanchinan, basha cura di cas abao.

No tabata tin ningun incidente sinembargo y e Jouvert Morning a sigui despues normal te un final exitoso.

For di 1982 en adelante a cuminsa usa Lago Sport Park (Awe Joe Laveist Sport Park) como salida di Jouvert Morning.

Un actividad carnavalesco cu danki na "The Twelve Tribes", "Mary Simons" y "Swinda Petronella Kelly" cu a bira conoci como Mama di Jouvert Morning den transcurso di añanan, ta un di e atraccionnan mas grandi di paradanan di temporada di carnaval di nos isla.

Telefon di
DIARIO
826747